





Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 7 Yangia anidakangma :



tir yimym TAPAK 8

Imran Khan anema ken o tasen tenet benok

Del Potro tennis asaya nungi anisungziker



VOL. XXII ISSUE NO. 54 (ADOK 54) DIMAPUR SANGTENNÜ (TUESDAY) LUCHII (DECEMBER) 03, 2024 ₹ 5.00

Nagaland-i partner countries & states den senden amen

Dimapur, December 2, 2024 (TYO): December 2, 2024 nü Bamboo Hall, Kisama nung partner countries aser partner states den senden ka menogo.

Iba senden ya tesentaktep yanglutsü aser kati ka den yaritepa inyaksangshia aotsü atema amen ta Investment & Development Authority of Nagaland (IDAN) Chairman & Advisor to Chief Minister, Abu Metha-i ashi.

Paisa linük aser state balala nungi aruba ketdangsürtem dang sobaliba aser inyaksangshi dak alia Nagaland nung rongsenketzung tsütsü inyaksüba lenmangtem aser maongkatem reprangtsü ayongzük.

Sikkim sorkari Hornbill festival nung kanga yariteper aser nübo aika arua shilem agiba atema pelar ta Metha-i ashi.

Sikkim aser Nagaland nung ali rongsen aser mozü amshiba sobaliba mesüktepa lir ta Agriculture Advisor Mhathung Yanthan-ia ashi.

"Sikkim aser Nagaland tsüngda coffee aser millet plantation atema amalitepa inyaksüla kechiyong Nagaland nung iba tsünütsü ana kanga junga tsünüteter. Asenok tsüngda tesentaktep tajung yur shishilembatsüla aser tsünütsü bendentsü atema infrastructure yanglutsüla" ta pai ashi.

"Nagaland-i alima nem agütsütsüba nung Hornbill Festival ya shilem tila ka lir. Nagaland indang tashiji lanurtem ket nung lir aser iba asoshi state sorkari bendanglen nungi investors den tesentaktep ayutsü meranger" ta Industries & Commerce Advisor, Hekani-

i ashi. "Republic of Peru aser Naga nunger tsüngda nisungtem sendakteptsü kanga tongtipang kechiyong asenok sobaliba aser inyaksangshi mesüktepa lir" ta Ambassador of Peru to India, Javier Manuel Paulinich Velarde-ia ashi.

Paisa Peru aser Naga nungeri lisopur shisatsü lemsateptsü aser tesentaktep yur külem taginübatem asoshi inyaka aotsü ayongzük.

"Nagaland sorkari Country aser State partners den tesentaktep aika yanglutettsü. Nagaland-i Agri & Allied sector, Sports, Tourism, Human Resource Development amala nung yaritepa otettsü aser Nagaland ya South East Asia den sendaktepba tongtipang tesem ka lir" ta Joint Secretary, IDAN, Reny Wilfred, IAS-i ashi.

Iba senden nung DIPR Sikkim Secretary, Annapurna Alley-ia state ana tsüngda temesüktep balala den alima mesüktepa o tourism sector indang onüktem jembi.

Nagaland sorkari bamboo resources amshiba nung tejakleni aoba atema lai tenüngsang agütsü.

Annapurna Alley-isa May 16, 2025 nü Sikkim 50 buba Statehood Day nung Nagaland adentsü atema pelashishia jaok.

Iba senden nung Department of Higher Education, GoN o Salesforce.com India Pvt. Ltd tsüngda aser Investment & Development Authority of Nagaland o Omsheel Foods tsüngda Memorandum of Understanding (MoU) ana nung sign sütepa liasü.

Foothills Road mapa tenzüksü anogo züngzüksür

Dimapur, December 2, 2024 (TYO): December 2, 2024 nü NFHRCC, Dimapur nung kin hohotem aser Young Nagas Action Committee for Foothills Road rongdak senden ka menogo.

Iba senden nung adenertemi State sorkar/bangdak Department dang anogo 4 tsüngda Foothills Road atema work order agütsütsü aser iba amaji meinyakra kin 12-i Hornbill festival nung shilem agitsü aliba athitsü ta telemtetba agia metetdaksüogo.

Senden nung Foothills Road 2 Lane construction project indang benoka lemsatepdang iba ya People's Project ka lir anungji nisung shingaija iba mapatong

madak tashi amshitsü makok ta bangzung ka renemogo.

Senden nungsa NFHRCC dang nungi tezüluba nung temelaba memeshii Foothills Road indang alignments memelenshidaksütsü aser nisung kari danga merangra tapet telangzüba agütsütsü ta lemtet.

Department-i October 28, 2024 nü züluba shidi ka ajanga NFHRCC nem work assignment agütsüogo anungji bangdakpur shingaija iba nung temelenshi asütsü makok. Iba shidi nung aliba onük melenshira ibaji kin 12 ashioktsüba ama züngshitsü aser tebilemstü khuretji sorkari/Department-i abentsü ta tanü senden nungsa bangjemtepa lemtet.

Hornbill Festival nung "Cultural Connect" tenzükogo

Dimapur, December 2, 2024 (TYO): 25 buba Hornbill Festival anogo anabuba nung "Cultural Connect" ta ser sentong tenzükogo aser iba nung Nagaland nung kin balalai sobaliba shilem agir.

Iba shilem tenzükba sentong nung Deputy Chief Minister & Planning & Transformation Minister T.R. Zeliang-i host aser Land Resources Advisor G. Ikuto Zhimomi-i co-host ama shilem agia liasü.

Sentong nungsa External Affairs and Partnerships, South Asia, Reckitt, Director Ravi Bhatnagar-i tetushi süa jaoker ama shilem agi.

"Cultural Connect" ya Hornbill Festival nung tongtipang shilem ka lir aser Nagaland nung kin shiai pei pei yartsüngsangtem o sobaliba ken balala ajanga shilem agir.

Tanü agiba sentong nung Angami Cultural Troupe-i Sozie Pfhe aser Ao Cultural Troupe-i Moatsü benjung nung külemküjaba ia sayu.

Maneni, Chang Cultural Troupe-i Sangsang Yamli, Chakhesang Cultural Troupe-i

Kole (Unity Song), Khiamniungan Cultural Troupe-i Mongkao Kum, Mizo Cultural Troupe-i Cheraw Dance (Bamboo Dance) & Sarlamkai aser Garo Cultural Troupe-i Jaktong Sika shilemtem agia liasü.

Sentong mezüngbuba shilem nungsa Konyak Cultural Troupe-i Sang Pu Hem, Lotha Cultural Troupe-i Ritso Sharü (War Dance), Kachari Cultural Troupe-i Majangdini, Phom Cultural Troupe-i Üngo Jala, Yimkhiung Cultural Troupe-i Athrong Khün, Sumi Cultural Troupe-i Aphilo Kuwo, Zeliang Cultural Troupe-i Luisunbo, Tikhir Cultural Troupe-i Tsonglak Tsin aser Kuki Cultural Troupe-i Kangchong Kap (Top Game) shilemtem agia liasü.

Tanü anüngdang agiba Cultural Extravagance nung PHE Minister, Jacob Zhimomi-i host aser Agriculture Advisor, Mhathung Yanthan-i Co-host ama shilem agi.

Iba sentong nung Zeliang Cultural Troupe-i Tmangra Lin (Fly Dance), Kuki Cultural Troupe-i Lenchongghoi La, aser Kachari Cultural Troupe-i Rimin

Nelaiba, Tikhir Cultural Troupe-i Lumaiti aser Sumi Cultural Troupe-i Cheloche (Cock Fight) shilemtem agi.

Iba sentong nungsa Sangtam Cultural Troupe-i Khling Kyaba, Rengma Cultural Troupe-i Mapi Ghi Khwi, Pochury Cultural Troupe-i Jujutsong, Phom Cultural Troupe-i Chanyathaku. Pangyenla (Yarn Spinning), Lotha Cultural Troupe-i Eramoren Poni Nzanta Khen aser Konyak Cultural Troupe-i Weehok Ok Yang E Lokpu Hei Weetangpu shilemtem agi.

Maneni, Ao Cultural Troupe-i Watemdong Cultural Club, Ungma, Limayanger Jamir Tatar ajanga mejemba ken ka aten aser iba ya 25 buba Hornbill Festival nem tetushi agüja mejemba lir. Parnok sülen Khiamniungan Cultural Troupe-i Hoiyie Zui, Chakhesang Cultural Troupe-i Chupri Hoo aser Garo Cultural Troupe-i Anching Re' Re shilemtem agia liasü.

Tatensa Chang Cultural Troupe-i süngkong atemba aser Angami Cultural Troupe-i Seish Pfhe shilemtem agi.

Tourists ya yi ajemtsü atema masü saka Naga nunger sobaliba aser libaliro reprangi aruba lir: Rev. Dr. Zelhoo Keyho

Kohima, December 2, 2024 (TYO): Nagaland-i aruba tourist ya yi ajemtsü atema masü saka Naga nunger inyaksangshi aser sobaliba reprangi arur ta Nagaland Baptist Church Council (NBCC)-i metetdaksüogo.

"Sorkari Nagaland Liquor Total Prohibition (NLTP) Act nungi medical supervision kübok yi jemertem anepaluba, military & paramilitary-i parnok barracks nung yi amshiba aser hoteliers-i yi terara amshitsüba onük nung ajemdaker lemtet agi. Item onük aser permit agütsütsüba ya NLTP Act 1989 nungtimi lateta lir" ta NBCC general secretary Rev. Dr. Zelhoo Keyho-i sangdong ka nung ashi.

"NLTP Act takok ngua meinyaktet ta asübaaji ochi o lir aser arogoi ola adokaka yi talubosa dang angur. Kümtem süia arudang iba onük atema kati ka dak tai tongloktsütepa arur" ta pai ashi. "Iba tebilemstü atema sorkar o arogo tsüngda atsüteper aser kati Act agientsü aser kati Act akangshitsü atema tokteper" ta Rev. Keyho-i ashi.

"Nagaland ya revenue peria manguba state ka lir anungji takoksa tulu angur ta sorkari ashir. NLTP Act atema jembidang sorkari tanga state tem aser tanga tesemtem den medemdanga jembir" ta pai ashi,

Külen Arogoi yi ajanga loktiliba aser kibong asoshi teraksa bentsür aruba indang jembir. Tetsü shiai yi ajanga

kibong raksatsüba indang otsü ashir saka asenoki ibaji senzüka yutsür Act agientsü mesüra magientsü atema rarateper, ta Rev. Keyho-isa ashi.

Tang-a Hornbill festival nung iba tebilemstü onük adokogo aser tanga kecha agia masü saka benjung amongi aruba tourist tem dak ajemdaker sorkari yi noktanga aliba agientsü jembir ta pai ashi.

"Nagaland-i arurtem yi ajemtsü temelaba aliba agi tourist tem arurba masü saka parnok ya asen sobaliba, senmang aser asenok lisopur libaliro metettsü aser reprangtsü atema arur. Asenoki koda ser asen sobaliba aser taküm libaliro tajungtiba sayutsü ta asüba ang bilemstüla" ta pai ashi.

"Parnok yi ajemtsü atema dang arurba süra state tai kati arur. Sorkari yi ayoktsü latettsüba ajanga parnok ya yi ajemi arur ama dang sayur. Iba khuret nung parnok densemdaksüba ajanga parnok temulung yirutsü. Parnok ya Naga nunger sobaliba aser loktiliba inyaksangshi reprangtsü atema arur aser asenoki parnok pelashishia agizükur" ta Rev. Keyho-isa ashi.

"Benjung ya nisung ajak pelatepa amongba mapang ka lir aser tanga wadang nung asenoki tangar memenepi lir saka sobaliba aser inyaksangshi nung süra asenoksa tajungtiba lir. Naga nunger ainer kanga junga anepaluba, mulungsoba aser sobaliba senmang tarok aliba atema asenok tangar tsüngdang

nüma atanger saka asenok loktiliba samatsütsü aser telemsa adoktsüba nungbo asenoki nüma matanger" ta pai ashi.

"Yi ajanga kibong aika raksatsüogo, tanur aika tebu mali kümdaksüogo, kinungtsü aika amitsür kümdaksüogo, lanur aika school o college züngtor anendaksüogo. Item ya asenok asoshi khuret tulu lir aser Arogobo Act den külemi noktaka lir" ta Rev. Keyho-i nenshia metetdaksü.

"Yi ajanga state küzmüksütsü mesüra yanglutsü ta asüba nung onoki mamanger. Nagaland ya Khristantem teimba ser aliba state ka süaka asenok Khristan ka ama temjena mali saka onoki yi magizükur aser ainertem dang iba osang metetdaksünür" ta paisa ashi.

"Hornbill benjung tembangba sülen NLTP provision ajanga takoksa bentsür aruba metembangtsü. Nenoki (tourist) Nagaland toktsür oadoktsü saka NLTP provision ajanga ozü loktiliba nung kongshitsü. Anungji ozü libaliro reprangtsü atema nenok timi aruba ama nenok nem latettsüba NLTP provision nung metangshii timi monger aotsü imlar" ta Rev. Keyho-isa tayongzükba olen ka shiogo.

"Naga nungeri parnok tsüngda telemsa adokba ajanga masü saka sobaliba senmang ajanga jangratema mongdaksüogo ta nenoki alima dang ashitsüsa amongtsü moatsür" ta NBCC general secretary-isa ashi.

Battle of Kohima bilemteta World War II Peace Rally ayongzük



WWII Museum Complex, Kisama nung December 2, 2024 nü 13th WWII Peace Rally alidang tangokba noksa ka nung Chief Minister Neiphiu Rio den tongtipang nisungtem aser rally nung shilem agirtem angur.

Dimapur, Luchii/December 02 (TYO): Battle of Kohima bilemteta December 2, 2024 nü Naga Heritage Village, Kisama nung aliba WWII Museum Complex nung World War II Peace Rally ayongzükua liasü.

Iba sentong nung linük balala aser state nungi tongtipang nisungtem arua aden, kong India Head of the Welsh Government aser Partner Country Representative, Mitchell Theaker tongti tesemdang liasü.

Chief Minister Neiphiu Rio mangdang nung ayongzükba rally nungya puti otsütem amshia yimjung tali ajungketdaksür.

Iba sentong nung NAMSA chairman aser Advisor to Chief Minister Abu Metha-ia alima nung tesunep alitsü atema rara otsütem ya amshitsü nungdaker ta ashi.

Iba rara mapang Naga nungeri tongti shilem agiba indang Metha-i lemsatop aser ibaji ajanga alima nung

temelenshi aru, ta ashi. Pai iba sentong nung adener tem dang Naga nübur indang ambassadors ama inyaksü asoshi Naga nunger otsü alima ajanga dang sangdongtsü ayongzükua liasü.

Mitchell Theaker-ia Naga nunger aser Welsh nübur tsüingta tesendaktep aliba atema tenüngsang agütsü aser iba tesendaktep maneni wazüka ayutsü aser akangshitsü ajungshia liasü.

Iba sentong ya ajanga kin ana tsüingta yimjung apular asütsü aser alima dang telungjem temaitsü sayutsü imlar, ta pai ashi.

Chief Minister Neiphiu Rio-ia sentong nung jembidang Battle of Kohima ya Naga nungeri puti otsü nung tongtipang mapang ka liasü ta ashi aser iba rara ajanga akoksatsüba aser yimjung tashi melenshiba indang pai jembu.

State telungzük nung, kidanger region aser alima dang

yimjung sangdongtsü nungdaker, ta CM Rio-ia ashi aser lanurtem dang iba peace rally mesamadaksütsü ajungshia aser sorkaria Nagaland Flatfenders Club yaritar aser yaritsü ta ashi.

Nagaland Flatfenders Club tir T.J. Longkumer, IPS (Retd.) ajanga iba rally nung takok angurtem sangdonga liasü.

Most original vehicle sempet ya Jeep number 6 nem agütsü, Jeep 1 ajanga tanabuba aser Jeep A ajanga tasembuba jenjang angu.

Jeep 25 nem best maintained vehicles sempet agütsü, Jeep 11 nem best weaponry, Jeep 18 nem best uniform squad aser Jeep 9 nem best Tourism Promotion Squad sempet agüja liasü.

Iba sülen World War II mapang region indang puti otsü melenshitsüsa bendanga agütsür nem akhum agüja aser yimjung asoshi asendenshir inyaksü züngzüktepa sentong tembang.

Treasures of Nagaland exhibition-cum-sale semzükogo

Dimapur, Luchii/December 02 (TYO): YouthNet ajanga ayongzükba aser NABARD ajanga sponsor asüba Treasures of Nagaland exhibition-cum-sale sentong December 2, 2024 nü Made in Nagaland Centre, Kohima nung General Manager/OIC, NABARD, Pauliankap Bulte-i semzüksü.

Iba sentong semzüksüba mapang jembidang, Cottage Industry nung ajemdaker chiyongtsü yangluba tsütsü North East nung danga states tem dang nungi Nagaland tejaklen lir, kechiaser market nung nüburtemi yangluba chiyongtsü balala angur, ta Pauliankap Bulte-i ashi aser Naga Cuisine temaba jenjangi ajungkettsü ajungshia liasü.

NABARD ajanga yaritsüsa cluster mode of food processing atema entrepreneurs alinung

ajungtsü, ta pai ashi.

Pai Treasures of Nagaland exhibition-cum-sale nung shilem agirtem aser entrepreneurs tem nem tenüngsang agütsü aser customer temi ashiba angatsüla aser nenoki yangluba nung temelenshitsü ashiba angaoka inyaksüla, kechiaser züngzünga angaoka mapa kuma inyaker tem indang products tajungba akumtsü ta ashi.

Iba sülen Pauliankap Bulte-i Ribbon Cutting Ceremony nung shilem agi aser stalls tem semdanga liasü.

Nodal Officer & Head-Business Development & Corporate Communication, YouthNet, Razouvikhoh Luho ajanga pela agizükba o jembidang YouthNet yagi 2019 kü ajanga pela agizükba o jembidang YouthNet yagi 2019 küm nungi NABARD den

lungjemer skill development aser hospitality sector nung entrepreneurs nem training agüja arur ta ashi.

NABARD teyari nung shilem agir aika training agir tanü pei wadang nung takok ngua nokdaka lir aser tang anogo ter exhibition-cum-sale yagia shilem agiba entrepreneurs dak kongshitsü imlar, ta pai ashi.

Iba sentong nung Supervisor-YIC, YouthNet, Vetolu Dawhuo menden liasü aser sapang tuluba nung local artisans aser entrepreneurs tem ajungkettsü mechi Hornbill Festival küm 25 ajungba nung shilem ka ama Treasures of Nagaland exhibition-cum-sale ya ayongzükta ashi.

Iba sentong nung district balala nungi entrepreneurs tem dena liasü.



Mapang balala nung apuba IMLF aika December 2, 2024 nü Mokokchung nung raksa indoka liasü. Iba maparen ya MMC dumping site nung Destruction Committee züngsem Public Prosecutor (PP) Mokokchung, Chairman; SDPO Mokokchung, Member; SDO (C) Mokokchung, Member; DPRO Mokokchung, Member aser PI Mokokchung, Member nungertem lia inyaka liasü, kong Sr. Superintendent of Police, Mokokchung, Vesupra Kezo-a liasü.

Office of the ASEMBA KIDONG TELONGJEM CHUNGTIA, Mokokchung, Nagaland TETUSHI AGÜTSÜR

Ngangshikaba aser Ningsangtula na jabaso Imnakaba Jamir-i NPSC CTSE 2024 examination nung takok ngua Land Record and Survey Department kübok Survey Officer (Class-II Gazetted) jenjang ajangzükba asoshi Asemba Kidong Telongjem Chungtia ajanga khonang tetushi tulu agütsür.

Nü takum nung mera tasen nung ayaoka aodang tajungtiba südakjang ta onoki moatsür aser nü wadang nung maneni tajungtiba nung bendanga agütsür ochishia tenzüksü imlaa atar.

Sd/- Talitsungba

Sd/- Watitemsu.

Kigwema nung Pony Farm semzük

Dimapur, Luchii/December 02 (TYO): Advisor, Animal Husbandry & Veterinary Services, Kazheto Kinimi ajanga December 1, 2024 nü Pony Farm, Kigwema semzükja liasü. Iba sentong nung Vikeyie Kenya, IAS, Commissioner and Secretary, AH & VS, Government of Nagaland menden liasü.

ICAR aser local entrepreneurs lungjemer iba tesem nung Weeshi products, Mithun display, Milkcon showcase, pony rides aser

chiyongtsü tabu balala angutsü.

Kazheto Kinimi meina Advisor, Information Technology & Communication, Economics & Statistics, Evaluation, Sethrongkyu; Advisor, Advisor of Fisheries & Aquatic Resources, A. Pangjung; Advisor, Prison, Printing & Stationary, Er. Kropol Vitsu aser Advisor, Tribal Affairs & Election, H Tovihoto Ayemi nungertem oa department aser entrepreneurs tem ajungmesoa liasü.

Kisama nung State Medicinal Plants Board semzük

Dimapur, Luchii/December 02 (TYO): Ayush Wing, Directorate of Health & Family Welfare asalendong kübok State Medicinal Plants Board and National Ayush Mission, Nagaland atema Exhibition Stall ka Anoop Khinchi, IAS, Commissioner & Secretary for H&FW, Government of Nagaland ajanga Naga Heritage Village, Kisama nung aliba Medicinal Herbal Garden nung December 1, 2024 nü semzükja liasü.

Iba Exhibition Stall semzüksüba mapang Khinchi-ia Ayush staff tem dang state nung nüburtem temang aser takum libaliru yimya ajungkettsü asoshi mera ajak agitsü ajungshia liasü.

Pa sasa adokba medicinal

plants ya Naga nunger asoshi teimla tulu lir, aser state nung medicinal plants sector renloksü aser tejakleni aotsü atema sorkaria akokba lenmang nung yaritsü, ta pai ashi.

Medicinal Herbal Garden nung exhibition stall lapoktsü asoshi maparen tenzüksüba atema Deputy Director (Ayush), Dr. T. Bendangtula ajanga Khinchi dang pelaba lemsatop.

Iba stall nungya medicinal plants saplings, herbal tea, Ayurvedic & Homoeopathic mozü aser IECS tem angati agütsür.

Iba den külemi stall nungya Naga traditional herbalists temi yangluba Ginseng, Wild apple, Sumac, essential oils, Rhododendron juice amala angutsü.

Hornbill Traditional Shot Put tetoktepa ayongzük



Dimapur, Luchii/December 02 (TYO): Department of Youth Resources and Sports ajanga Naga Heritage Village, Kisama nung December 2, 2024 nü Hornbill Traditional Shot Put tetoktepa ayongzükua liasü.

Iba sentong nung Nagaland nung aliba kin ajunga nungi nisung 18 adenshia toktepa liasü, kong Angami kin nungi Kelhoudelie-i feet 15.8 tashi

onteta tematiba jenjang tongtet aser Garo kin nungi Likho Sangma aser Chang kin nungi Kevisar nati tanabuba aser tasembuba jenjang nguteta liasü.

Naga nunger sobaliba aser yimsü-yimbong sayutsü aser temaba jenjangi ajungkettsü mechi anogoshi Hornbill Festival nung traditional games balala ayongzükua akar.



New Delhi, December 02, 2024: Bangladesh nung Hindu nungertem anema inyakba aija New Delhi nung Vishva Hindu Parishad (VHP) züngsemtemi longkak aitdang tangokba noksa nung angur.

Opposition-i o enteptsü akhangba Lok Sabha Speaker-i agizük

New Delhi, Luchii/December 02 (Agencies): Hombarnü sorkar aser opposition party temi Lok Sabha aser Rajya Sabha senden junga katettsü atema bangjemogo.

Linük temzüng atema o enteptsü asoshi opposition-i akhangba ama Lok Sabha Speaker, Om Birla-i agizükogo, ta osang ka ajanga metetdaksü.

Parliamentary affairs minister, Kiren Rijiju-i, December 13-14 anogotem nung Lok Sabha nung aser December 16-17 anogotem nung Rajya Sabha nung linük temzüng atema o enteptsü telemteba agiogo, ta metetdaksü.

Kiren Rijiju-isa, Mongolbar nungibo Lok Sabha aser Rajya Sabha naprongla nung senden junga katettsü imlar, ta metetdaksü.

Hombarnü Lok Sabha Speaker Om Birla-i ayongzüka

party balala nungi floor lenirtem senden mena liasü. Iba senden nungji party balala nungi lenirtem-Lavu Sri Krishna Devarayalu (TDP), Gaurav Gogoi (Congress), T R Baalu (DMK), Supriya Sule (NCP) nunger den SP, JD(U), RJD, TMC, Shiv Sena (UBT) aser CPI(M) party tem nungi lenirtem aden.

Floor lenirtem senden nungji Rijiju-a densema liasü.

Senden tembangba sülen osangbenertem den jembidang Rijiju-i, "Tanü Speaker (Om Birla) den party ajak nungi Floor lenirtem senden mena liasü. Tesüiba anogo ishika Parliament nung senden junga magiteti aruogo. Onokia Parliament nung züngsem ajak dang Parliament-i arua parnok tebilemba lemsatepsü ajungshi. Anogo aika Parliament nung senden junga magitetba ya majung. Ajaki iba nungji hau ta bangjemogo," ta

metetdaksü. "Lok Sabha nung mezüng iba onük nung o lemteptsü. Ajaki ibaji agizükogo. Speaker-ia, nisung kari danga onük jar benoknüa lira iba atemaji temzüng lir ta shiogo. Nenoki notice ka agütsüta akok, saka Parliament nung rongrong adokdaksüba aer tetsükdaksü agütsüba ya majung ta pai ashi. Ajaki ibaji hau ta agizük," ta paisa metetdaksü.

Rijiju-isa, "Asüng nungi ajaki o lemteptsü melungogo. Lok Sabha nung o lemteptsü sülen onoki mezüngbuba Bill agizüksü. Rajya Sabha nunga bill tem benoka agizüksü. Ni maneni Opposition MP tem aser lenirtem dang, tanü asenok ajaki bangjemba ama inyaksü ayongzüker. Parliament senden junga katettsüla. Asüng nungi tenzüka senden junga agitettsü atema tezüngzüktep agiogo. Yamaji ataloktsü ni imlar," ta ashi.

Maharashtra CM menden atema Devendra Fadnavis shimogo

Mumbai, Luchii/December 02 (Agencies): Maharashtra nung Chief Minister menden atema BJP lenir Devendra Fadnavis shimogo; kobi melii BJP MLA temi pa legislature party lenir shimtsü, ta osang ka ajanga metetdaksü.

Taoba Chief Minister, Eknath Shinde-ia, Chief Minister menden atema BJP-i kechi telemteba agidir pai agizüksü, ta metetdaksüogo.

Eknath Shinde'er jabaso

Shrikant Shinde nem Deputy Chief Minister menden agütsüta aser Shiv Sena nem Home portfolio agütsüta, ta olulu jembiba mapang nung Eknath Shinde-i, Mahayuti teloktep nung densema aliba party tem- BJP, NCP aser Shiv Sena-i külemi mener o lemtepa telemtebatem agitsü, ta metetdaksü.

Tawa Maharashtra assembly election nung Mahayuti teloktepi takok angu saka tesüiba anogo aika Chief Minister shiba asütsüar

telemteba magiteti aruogo. Iba election nung single largest party ji BJP liasü (menden 132).

December 5 nikongdang Mumbai nung aliba Azad Maidan nung Mahayuti sorkar tezüngzüktep agiba sentong agitsü.

Tang tashi BJP legislature party senden mamen saka Shiv Sena-ibo legislature party lenir Eknath Shinde shimogo aser NCP-ia Ajit Pawar legislature party lenir shimogo.

Aluyimertemi longkak aita Delhi tsütsüleni ao

New Delhi, December 02 (Agencies): Hombarnü aluyimertemi longkak aita 'Delhi Chalo' march tenzüksü lia Delhi aser Noida tesem aika nung traffic timtem liasü.

Bhartiya Kisan Parishad (BKP) den külemi district 20 nungi aluyimer telok balalai sorkar nem takhangba onük balala agüja longkak ait.

Hombarnü Delhi-NCR tesem aika nung gari junga mesenzüteti anendena liasü aser aluyimertem Delhi telungi aitba nokdangtsü atema arrtsülen security sepaitem aser police aika lemsükja tenokdangba balala yua lir.

Greater Noida nung aluyimertem aser ketdangsertem senden amenba mapang nung ketdangsertemi aluyimertem tebilemstü onük bentettsütsü atema hopta ka mapang agüjang, ta aluyimertem dang mepishia liasü.

Aluyimertemi ali shilem 10 aser Acquisition ozüng tejenba kübok temenok shilem 64.7 agüjang ta akhanger, iba denji külemi 2014 küm January 1 anogo nungi tenzüka sorkari

agiba li nungi shilem 20 agüjang ta akhanger.

Aluyimertemisa ali maliba aluyimer chirnurtem nem mapa agüjang ta akhanger.

Aluyimertemisa, hopta ka tsüngda takhangba magizükra parnoki ano asentenshir 'Delhi Chalo' march agitsü, ta metetdaksüogo.

Hombarnü aluyimertemi Noida nung aliba Mahamaya Flyover nungi longkak ait tenzüka tetsüng aser tractor nung Delhi tsütsüleni apusoa liasü, ajisüaka police-i parnok nokdang.

Longkak aiter aluyimertemji Bhartiya Kisan Parishad (BKP), Kisan Mazdoor Morcha (KMM) aser Samyukt Kisan Morcha (SKM) densema aluyimer tentet balala nungi züngsemtem liasü.

Additional CP (Law and Order) Noida, Shivhari Meena-i, "Police 4,000 dak tali mapa lemsükja liasü. Security ji shilem asem lemsar liasü. Aluyimertem lenir karbo puogo. Kechi südir süaka onoki aluyimertem Delhi-i aotsü memelatsü," ta metetdaksü.

Bangladesh nung UN Peacekeeping Mission nüngdaker: Mamata Banerjee

New Delhi, December 02 (Agencies): Hombarnü West Bengal Chief Minister Mamata Banerjee-i state legislative assembly nung Bangladesh tensa atema tebilemstü akaba lemsatep; lai India sorkar danga Bangladesh nung UN peacekeeping mission amenoktsü atema asüngdangtsü mepishi.

Laisa Ato kilonser Narendra Modi danga Bangladesh nung reshikangshiba Hindu nungertem India-i anir arutsüla, ta mepishi.

Mamata Banerjee-i India sorkar dang, asükwa mongpu mapang nung Bangladesh nung tensa mejungi aliba dak sendakba nung India kechi tangatetba aliar sangdongtsüla, ta ashi.

Ano külen tanga osang ka nung, Hombarnü West Bengal kübok North 24 Parganas district nung putir 1,000-i Petrapole arrtsülen longkak aita Bangladesh nung Hindu nunger amakba aitsüba den külemi Hindu lenir, Chinmoy Krishna Das chiokang,

ta takhangba agütsü.

Taküm August 5 nü Bangladesh nung Sheikh Hasina-i aniba Awami League sorkar chirepba sülen linük nung Hindu nungertem anema inyakba manener. Tang Bangladesh nung nütüsung shilem 8 bo Hindu nungertem lir.

Bangladesh nung yimjung atema UN peacekeeping mission nüngdaker, ta shia Mamata-i, "Iba atema official süa jembitsü asoshi kü dak temeden mali, anungji Ministry of External Affairs-i iba onük ya Bangladesh ketdangsertem den jembitsüla, aser nüngdakra United Nations den-a jembitsüla," ta ashi.

"Reshikangshi tia nung aliba India nungertem küzmüksüla aser teyari agütsüla. Nüngdak dang süra asenoki Bangladesh nung takoksa angur India nungertem yaritettsü. Nüngdak dang süra asenoki parnok den chiyungtsü lemsateptetsü," ta laisa metetdaksü.



December 02, 2024 nü aluyimertemi longkak aita Delhi-i apusoba sülen Chilla arrtsülen police-i aluyimertem nokdangtsü atema atsü atsüdang anükba noksa nung angur.

SBI State Bank of India
STRESSED ASSETS RECOVERY BRANCH, JORHAT
Na-Ali, M G Road, Jorhat, Opp. ASEB Building, PIN-785001 (Assam)
Tel No : 0376-2300193 / 2300204

[Rule - 8(1)]
KIOJEN AGIBA NOTICE

Securitisation and Reconstruction of Financial Assets and Enforcement of Security Interest Act, 2002 aser section 13(12) read with Rule 3 of the Security Interest (Enforcement) Rules 2002 nung aliba tashi kübok State Bank of India nung Authorised Officer-i 26.07.2024 anogo nung Demand Notice ka ajanga sen apurtem (1) M/s Liniza Garments Manufacturing Unit, Proprietor Mrs. Olivi S Awomi, House No. 72, United North Block B, Burma Camp, Dimapur, PIN: 797112 & (2) Mrs. Olivi S Awomi, Proprietor M/s Liniza Garments Manufacturing Unit, House No. 52, Model Colony, Purana Bazaar, Sangtam Baptist Church Road, Dimapur, Nagaland, PIN: 797116 dang 26.07.2024 anogo tashi nung sentsüh **Rs. 25,85,573.28/- (Rupees Twenty Five Lakhs Eighty Five Thousand Five Hundred and Seventy Three and Twenty Eight Paise only)** den külemi 27.07.2024 anogo nungi tenzüka sen tetemlok den incidental expenses, costs ajak iba notice agütsüba anogo nungi tenzüka anogo 60 tsüngda agüjang ta tuyua liasü.

Ajisüaka sen apurtemi senji magütsütet, anungji sen apurtem/Guarantor aser public dang tsünglanglen shia aliba kiojenji iba Act nung Section 13(4) aser Rule 8 of the Security Interest (Enforcement) Rules, 2002 nung agüja aliba tashi amshia **2024 küm November 27** nü iba kiojen agiadokogo ta sangdonger.

Talisa sen apur/Guarantor aser public dang iba kiojen dak sendakba nung kecha inyaksangshi masütsü metetdaksür, mesüra State Bank of India nem **Rs. 25,85,573.28/- (Rupees Twenty Five Lakhs Eighty Five Thousand Five Hundred and Seventy Three and Twenty Eight Paise only)** den külemi 27.07.2024 nungi tenzüka sen tetemlok aser incidental expenses, costs, etc agütsütsüba akümtsü.

Sen apur dang iba Act nung Section 13 kübok Sub-Section (8) nung ajemdaker iba mapang shidak nung iba kiojen alangzüksü metetdaksür.

Kiojen osang tejangia:
Manufacturing Unit nung Bank Finance ajanga alizükba Plant aser Machineries.
Date: 27.11.2024
Place: Jorhat

Authorised Officer
State Bank of India, SARB Jorhat Branch



TIR YIMYIM YIMOBILEM (EDITORIAL)

DIMAPUR SANGTENNÜ, DECEMBER (LUCHII) 03, 2024

Yi ya kangasa yokner na ?

Nagaland government-i yi jemnertem nem yi jenjang dalang agi jemdaktsüner asü (?) mesüra yi ayokba nungi anguba sen aginüar ashitsü makok, saka yi ayoktsüba mapa yabo kanga janrar amato tang Hornbill benjong alidak yi dokan lapoka yokdaktsüba mapa yagi sayur. Atangji, Hornbill benjongi alima tesem balala nungi raliwalirtem arur. Parnokji kar Naga nunger sobaliba indang metetnüa arur, kar Naga nunger sobaliba benjongmung amungba reprangner aser karbo Naga nunger lipok otsü aser parnok lobaliro indang metetnüa arur, ajisüaka Nagaland Baptist Church Council (NBCC) leniri ashiba amato, raliwalirtem Nagaland-i Hornbill benjong amongtsü arurtemji yi jemi arurbo masütsü. Atangji, raliwalirtem rongnungji yi majembo chia mechiyongtettsüla aser temanga shitak melitetsüsa yi lar kümer karbo alitsü akok, anungji parnok asoshijibo yiji kanga nungdaktsü. Aji oda, Nagaland government-i yi majemertem aser yi meyokdaktsünertem asoshi masü saka yi jemnertem asoshiang aria tebilemba bilemba ya temeim agi asü mesüra aiener atemer shi den chiyongner (?) ta asenok aika mulungjang nung bilema alitsü südi. Atangji, tangar ama asenokia yi ya tajem shia ajem nungbo, temesepba chiyongtsü ka ama masü saka chiyongtsü tajung ka ama bilema tayokertemia yokla aser tajemertemia jemla. Ajisüaka, asenokbo yi ajemtsüla masü, yi jemra ain adoker aser mapai maor, anungji yi ajemba agi pei temang dang masü kibong dena raksar. Ibayongji, asenokbo yi ayok tenzükra, yi ayokba nungi yokzükba sen dang nungi teimba aseni ain adoker raksaba kioset aser kiojen yanglushiba nung teimba aotsü aser asen temang nung yi agi rongzükbatem anepalu dang takaba ajak yoker külena meperitsü. America lima nunga yi ayoker saka parnokia yi ayokertembo azükaru masür ta J.F. Kennedy'er kibong agi atetshia jembir. Kasaji, tamalen asen lima nunga yi yanglurtem aser yi dokan lapoka ayokertema azükarua mangur. Aji oda, asenok nem angtetdaktsünüba agi Tsüngrem teka agi jara nungbo zülua sayur ser nung asenoki mangatetter. Atangji, Naga nungertertemi chi mechiyongbo melitetsü saka yi mayok aser yi majembo litettsü ser nung, yi ayoktsü aser mayoktsüba onük ya asenok Nagaland nung terenlok inyaktsüba mapatem rongnung tongtibangtiba ka ama jembir. Aji oda, Nagaland nung yi meyanglutsü aser mayoktsü ozüngbo zünga ayu saka Kisama nungbo yi talubu angur ta süra Hornbill benjong ya yi ayokba aser yi ajemba benjong ama ka dang kümadokogo. Iba ama jaliboliba tesem ka nung, Kisama nung alirtema Khristan asünungji, taküm kumbo Khristmas jeli sentep akatsü asoshi sentong adoka angur aser iba sentong nung adenertem rongnung tongtiji Nagaland Chief minister asütsü aser NBCC tongti leniri Tsüngrem o jembitsü agüja angur. Iba anogo nunga Kisama nung yi ayoktsü aser yangji Khristmas jeli sentep sentong nung NBCC lenir o jembitsü jaokbaji NBCC asoshi tetendangba aser tatidang tuluka asütsü. Joko, talangka amanga aruba agi asütsüa akok, asenoki Tsüngrem metsübu kümogo. Iba jagi asenok asoshibo amongnüa maka kümogo aser sentep aliba ya Tsüngrem masü saka asenok rongnung kati ka tushitsü asoshi senteper amai küma odagi. Aji oda, Tsüngrem metsübuba agi yimten nung dang masü saka arogo nunga auyar. Asenoki tang beshiba mapatem aser asenoki tang temulungjang nung bilembatem ya Tsüngrem tsüngdangbo tesempatsüka asütsü. Aji oda, Kisama nung Hornbill benjong amungba nung ya tajung aser tajangzüka aika lir saka itemji asenoki yi mayok aser majem maremba agi topur majung kümdaktsür. Naga nungerbo yi ajem mashi aser yi ajem mashir nem jenjang dalang agi yi tajung ajemtsüsa talubo ngudaktsübaji tanur nem nok techira agütsü amai asütsü. Iba jagi asenok rongnung lendong tulu adoktsü aser aiben tensa tipmatem kümdaktsütsü. Yi ayoktsüla ta ashirtemia pei chirnurtem dangbo yi ajemtsü majungshir, kechiyong yi ayokba aser ayi ajemba nung atakatem lir.

OLEMSABANG

YIMLANUR BETHLEHEM (ONSARA YIM TILA)

- Mr. M. Rongsen, Akhoya

"Oh na Bethlehem, Efrata, Yihuda Kidong nung tensemtsü onsara tila" Mica 5:2

Israel nüburtem alar tia Egypt nungi apusor küm 2 ita mezüing anogoshia rarai otettsü nübu tebur tain züngtangba mapang Yihuda kidong nungi sepay tajemtiba Bethlehem yim nungi liasü. Canan matong tashi rarajen rarayonga aotsü nisung tsütsü nungi temulung ajema Bethlehem dak mulung masü bilem. Saka tilatiba yim aser ishitiba rarar nübu aliba yimji shisangshisanga kümdaktsütsü Tsüngrem sentong tulu liasü.

David tetsü tebou Boaz aser Ruth nunger aliba yim, Yirusalem nungi mile 5 pilar David soa intetba yim, Yosef-a David kidong nungi jakzük asünungji Galil nung aliba Nazareth yim nungi Yisu asotsü Bethlehem-i ao. Yimti tulu Yirusalem ama masü saka ajemalua tematiba menden toktsür tilatiba meimchir jenjang nung arur asünung Bethlehem nung asotsü küm aika lia ainkartemi shin.

Tsüngremer temeim aser sayatenya jungkai atoktsü asoshi tilatiba nungi tenzükra. "Efrata" tetezü tejang jenti atangba. Ajemalu aser tila kümtetba nung azükaru temoatsü lir. Ajemalu aser tila kümtetba nung azükaru temoatsü lir. Ajemalurtemi moa. Mathi 5:5. Bethlehem yim tezühlen nashi ki tila ka yipden maka shiruru auso ka koba kümtetdakba Tsüngrem Chir asoshi kanga tongtipang oset aküm, tanü naia tilatiba mapa kar tenlatsü koka lir. Christmas tenüing nung nai akokba nungi timtemer kar, tanüla nung lula alir kar nungdakbapurtem den lemsatepa shilem agiba aser tepela senpet agi kiyonger, medemsor, tamanger lokti nung shilem agitsü koda mapang tajung.

Mother Teresa-i ashi, "Onoki inyakba mapa ya tzüyim tulu nung tzüjang tila ka mesük, saka tzüjang kaka samara tzüyim samatsü". Ne tenla koma tulu ta masü nai koda mulungtet.

Bethlehem nung Christmas anogoji Tsüngremi meimchir nem temeim agi agütsüba sempet tulutiba anogo. Gurunanak-i ashi, "Nai tangar nem agütsüba ajakji ne meyong lir, saka nai kechisa rizüngdena yudir aji ne meyong masü".

Anüdoklen nungi tashi temetetertem Bethlehem bushia tesangwa petinu repranga Yirusalem atong. Saka Yirusalem nung iba petinu sama parnok teimla ajak samadok. Bushitepa jaja, saka Yirusalem nungeri memetet. Ainkartemi shinba amadok, ali wadang nung mazüingi liasü.

39-37 BC nung Herod-i Roman sepoy anir Palistine lima Parthian nunger yimsü süa aliba atsüngdoker Roman nungeri Herod chuba shim. Yihuda nunger chuba yimti ajunga tatayuyu agi asüing. Tamaren temaba menden nung assüküm konang, mezümeküm nung ali tashi Tsüngremer shin o amadoktsü mesüra mangatettsü, Tsüngremer sentong aser nükjitong kodanga meratettsü.

Bethlehem Petinu teyari ajanga talang nungi tashi temeteter Yisu asoba tesem tonga koda arua Pa külem, yamaji tanü Yisu bushirtem na ajanga yaritettsü iba Petinu tesangwa kaka alitsü angazükdi.

Ne nem agütsüba tesangwa molok telung nung masü milen atalokba nung ayuba ajanga tangar nem teyari agütsütettsüsa renemshidi.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Taküm-a Bethlehem nung Khristmas benjung junga mamongtsü



November 30, 2024 nü Bethlehem nung Church of the Nativity kima Advent Khristmas tenzükba sentong nung tsür scout temi shilem agidang tangokba noksa nung angur.

Bethlehem, December 02, 2024 (Agencies): Taküm agi küm anabuba Bethlehem nung Khristmas benjung junga memongtettsü; bendanger raliwalirtemi Bethlehem mesendangba dang masü saka Bethlehem nung alirtema aikati yimti toktsür aoer.

Bethlehem nung Church of the Nativity kima Yisu Khrista asoba tesem 'Manger Square' kanga azüngmeyaka lir aser dokantem ajak shibangogo. Yaküm December nunga Bethlehem nung Khristmas süngdong meyaglui liasü. Yisu Khrista asoba tesem (Bethlehem) ya tangbo Israel-i agiba West Bank nung lir.

Nativity Church nung putir, Issa Thaljieh-i, "Palestine yimitem nung, talisa Gaza Strip nung tensa tamajungba aliba mapang ka nung tepela temaitsü sayutsüji kanga tasak," ta ashi.

Rara aliba ajanga Khristantema aikati iba yimti toktsür aotsü meranger aser bendanger raliwalirtema marur.

"Anogo shia aser ita shia Bethlehem toktsür aoer teimba-teimba dang akümer, aser iba ya

ajanga yimti kanga mejungi kongshir," ta Thaljieh-i metetdaksü.

Joko tesüba putu aika Middle East nung Khristan nütsüng tajemba dang akümer, yamaji West Bank nunga Khristan nütsüng kanga ajema kümogo.

British nungeri yimsüsüba tesüsabuba küm (1947) Bethlehem nung nütsüng shilem 85 bo Khristantem liasü saka 2017 census nungbo Bethlehem nung nütsüng shilem 10 shi dang (23,000 dang) Khristantem liasü.

Bethlehem nung restaurant ka kibur, Alaa Afteem-i, "Tawa ozü kinünger katia Bethlehem toktsür Australia-i ogo. Taküm libalirutsü jenjang majung aser rongsenkettzüng jenjang majung, ibayongji nisungtemi pei chirnurtem shisaliok aser tarutsü tia tajungba bushia tangaleni aoer," ta metetdaksü.

1967 küm Israel aser Arab linüktem tsüngda raraba sülen Israel-i West Bank atsünga agi. Israel-i akhi puti otsü aser Laishiba nung ajemdaker item

li ya parnok meyong ta ashir.

Yaküm October ita nung Hamas aser Israel na tsüngda Gaza nung rara tenzükba sülen Palestine nunger meyirjang aika süogo.

Bethlehem nung aliba Lutheran Church nung pastor, Munther Isaac-i, Bethlehem nungi Muslim nunger kibongtema tangaleni aoer, kechiyong yimti nung rongsenkettzüng jenjang majungba dang masü saka tarutsü atema-a teimla mangur, ta metetdaksü.

Küm shia Bethlehem nung Khristmas kanga longsoa amonger; talisa raliwalir bendangertemi iba yimti semdangba ajanga iba benjung kanga longsoa amonger, ajisüaka rara nung asür Palestine nungerem nem akhüm agüja yaküm-a Bethlehem nung iba benjung mamong.

Yaküm benjung atongtsü mapang ana nung lia Bethlehem Municipality nung otongdar kati, "Gaza nung taküm bendanga agüja asür ozü nüburtem (Palestine nungerem) nem akhüm agüja benjung mamongtsü," ta metetdaksü.

Ajisüaka Khristmas tekülem sentong aser sarasadembo agitsü, ta parnoki metetdaksü.

Küm shia Khristmas atongtsü mapang nungi tenzükba alima tesem balala nungi raliwalirtemi Bethlehem semdang aser Khristan aikati temeshi aini oa Bethlehem nung Manger Square semdang.

Bethlehem ya Yirusalem nungi mile 6 shi dang pilar West Bank kübok lir.

ANOGO ABEN TSÜNGREM DEN

Asenok Temeimi Rongmesoba

O temeshi Oba, alimai na memetet, saka ni na metet; aser Nai ni yok ta item yagi metet: aser ni parnok nem Ne nung metetdaksü, aser ano metetdaksütsü, anungji kechi temeim agi Nai meim aji parnok dak alitsü, aser ni parnok dak alitsü. Yohan 17:25-26.

Nai Tsüngrem yimlijji metetet; nai Tsüngrem yimlijji noktanger. Pa temeimi ne dak mekongshi tashi na Tsüngrem anasa alitsü makok. Kotaker Tebui Techir dang tatem maka temeimi meim. Tebui temenen lima temulung raksaa meimba Pa jabasoi Pa taküm ajanga jungkai adoktsü. Tebui meimchir kümzüktsü sentong atong aser Techiri mapaji agizük. Iba jagi Pa kangki dongi ani.

Yisu meimchir rongnung jajadang, Tebu temeimi par chir süngdaksü. Mashih temeim agi Pa kangki atutsüsa majungshitsü ta Yisui metetta liasü. Meimchir temeimi Pa taküm ajanga agi Tebui ashiba abensaa tashi angatsü makok ta Yisui angatetta liasü. Tebu tekümtet mapa sentong nung Pa taküm bendanga agütsütettsüsa Tebu temeimji dang tashi tait liasü.

Kasa temeimji nütsüngtem nema agütsütsü Yisui sarasadem. Tebui parnok nem agütsütsü aliba mapa atemaji tanga tajung shibaji teperi masü ta Yisui metetta liasü. Tsüngremer telangzübaji Par chir parnok dak lidaktsütsübaji liasü. Khristan ka asoshi pa temeimer agi sünger Tsüngrem den Pa mission nung malitsübaji tamakoktsü.

Pa temeimi sünga melira nai shinga dang Tsüngremi na yok ta kuli mesütettsü. Nai tangar dang tai metoktettsü aser talila mile moutettsü mesüra tangar asoshi tenla magütsütettsü. Item ajak inyaktettsü asoshi na mezüngbuba Tsüngrem temeim agi sünga alitsüla. Tebu aser Pa masadangtetba temeim bushiang; aji sür na ajanga tangar dang meimtsü Techir dang melaang.

Aleppo nung Syria nunger Khristantem lendong nung lir

December 02, 2024: Syria linük nung Islamic teloki kati Aleppo yimti agiadokogo, anungji iba yimti nung aliba Syria nunger Khristantem lendong nung lir, ta Arogo lenirtemi metetdaksü.

Sorkar sepaitem yimti nungi aienshiba sülen Jihad teloktemi iba yimti agiogo aser yimti nung Khristmas benjung sübotsü ajak indoktsüdar, ta osang ka ajanga metetdaksü.

Aleppo nung Maronite Archbishop, Joseph Tobji-i, "Yangi ano taküm asentenshiogo. Tensa süngjema liasü saka tangbo ajakji shibangogo," ta ashi.

Dokan ajak shibangogo aser yimti nung alirtemi jelia chiyungtsü rizünga meyutet, kechiyong kiralongrartemi ajungbena iba yimti agi; shingaia onok dang tekümdangtsü memetetdaksü liasü, ta putir Tobji-i metetdaksü.

Tang tashi nungbo Khristantem anema meinyaker, ajisüaka tarutsü anogotem nung kechi ataloktsüar memetet, ta paisa metetdaksü.

Kiralongrartemia social media ajanga parnoki Aleppo yimti agiba osangji sangdongogo.

Institute of the Incarnate Word nungi Fr. Hugo Alaniz-i, Aleppo yimti nung nisung ajak kiralongrartem tazüokba kübok lir, ta metetdaksü.

Hugo-isa, par Arogo Tenla ki tang tashi lapoka lir ajisüaka kaketshirtem aser kanga tantsür-tamburtem aika taküm kümzüktsü atema yimti nungi aienshiogo, ta metetdaksü.

Iraqi Christian Foundation-i social media ajanga, kiralongrartemi yimti nung Khristmas benjung sübotsü ajak agentsüogo aser parnoki apuba sepaitem ajak tekolak tangzükba tepsetogo, ta metetdaksü.

Iraqi Christian Foundation-isa Aleppo nung Khristantem densema nütsüng ajema aliba nisungtem atema sarasademjang, ta metetdaksü.

Switzerland nung amenoka aliba meimchir temeden atema inyakba telok Christian Solidarity International (CSI)-i sangdong ka ajanga, Hayat Tahrir al- teloki Aleppo yimti agiogo, aser iba ya ajanga 2014 küm Islamic State teloki Mosul yimti agiba imdangi arua bilemteter, ta ashi.

Jihadist teloki Aleppo yimti agiba ajanga Khristantem,

Alawites aser Shiites nungerem tsübuteper, kechiyong akhidang nungi Hayat Tahrir al- teloki tanga yimsü amangertem kanga reshikangshir, ta CSI-isa metetdaksü.

2012 küm nungi 2015 küm tsüngda Hayat Tahrir al- teloki nisung tepsetba, reshikangshiba, tashiyim amshia raksatsüba, tepuokdak ayuba aser yimsü dak sendakba temeshi tesemtem raksatsüba tatalokbatem United Nations' Commission of Inquiry on Syria record süa lir.

US Tir election atongtsü mapang anasa Tir shima alisang Donald Trump-i reshikangshi ajangshiba Khristantem kümzüktsü nangzükba liasü.

CSI international Tir, John Eibner-i, "Tir akümtsü alisangi nangzükba ataloktsütsü atema maongka tajung angur. Yimsü temeden aser meimchir temeden balala aginer Khristantem aser tangartemi election jakdang pai (Trump) nangzükbaji ataloktsü imlar," ta ashi.

U.K nung amenoka aliba Syrian Observatory for Human Rights-i ashiba agi, Bodhbar nungi Hayat Tahrir al- teloki

Aleppo yimti agiba sülen tang tashi nung civilian 20 densema nisung 300 dak tali tepsetogo. Parnoki Aleppo nung airport aser Aleppo yimti anasa aliba jilatem-a aika agiadokogo.

Syrian army-i ashiba agi, telok aika senteper Aleppo amakdang sepaitema aika süogo saka sepaitemi kiralongrar telokji amaktsü ta metetdaksüogo.



December 01, 2024 nü Kohima nung Kidima Inter-Denomination Revival Crusade tatemangbuba sentong nung Koinonia Baptist Church (KBC) nung pastor aser Kohima Bible College nung Prinsipal, Rev. Dr. Zotuo Kiewhuo-i Tsüngrem O jembidang tangokba noksa nung angur. Revival Crusade ya Kidima Village Council Hall nung November 28 nungi December 1, 2024 tashi agia liasü. Iba crusade nung Tsüngrem O jembirtemji Koinonia Prayer Centre nung pastor Rokopra Mekro, KBC nung Evangelist Meyiengonu Tetso aser Chairman of the Men's Fellowship, Koinonia Baptist Church, Khriezovolie nunger liasü.

AO OSHI ANGAZÜKDAK:

TANÜ ANGAZÜKTSÜBA OJANG

Tasüngtet

(adv) shi azü azüoka merükteta aliba taküm (morally pure, virgin)

* Tasüngtet aiür asangur taküm azükarua lia aoer.

Tasüpelet

(v) kanga tsüba aküm (frighten out of wits)

* Israel nunger Goliath ola angashir tasüpelet.



OLONG PAITEP # 7000

15x15 crossword grid with numbers 1-19 indicating starting positions for words.

TIPIEN

- 2. Teburtemi tejak nung awaba
6. T _ _ _ em
8. Tzüak ayudak
9. Nüngdakba dang timba
11. Züina ao
12. Yangi tzü angur
14. Tangar dang nungi tali
16. Senyong masü
17. Oadokdi
18. Tzü tarok
19. Yimtaklir aikati iba ya ki den külemi yanglusemer

LANGTSÜNGLEN

- 1. Temejangdak
3. Nisung ka mapa inyaksü nübo
4. Azüntsü asoshi mejemba
5. Tesangwa agütsüba
7. Tila masü
10. Tebenjem tetsür chanu
11. Tekolak nung inok
12. Tetsüngda
13. Tangar inyakba ka inyak
14. Tim masü ta ashi
15. Asalendong
16. Tanü dangtsü

OLONG PAITEP # 6999 TELANGZÜBA

TIPIEN :

- 1. Telok, 4. Aluru, 6. Ozüng, 8. Emk, 9. Kin, 10. Teti, 12. Süir, 13. Jen, 14. Ola, 16. Talak, 17. Mazük.

LANGTSÜNGLEN :

- 1. Tenükjang, 2. Luden, 3. Kiochtsü, 5. Lenti, 7. Tajangzük, 11. Teronem, 12. Sempa, 13. Jahaz.

NAI-A YA METETTER MA



Tang tashi nung alima nung sen teimtiba endoka kiyimba sentong ta asadanteta agibaji 2016 küm Russian oligarch Mikhail Gutseriev'er jabaso indang kiyimba sentong liasü. Mikhail Gutseriev'er jabaso Said Gutseriev aser Khadija Uzhakhovs na kiyimba sentong nung \$1 billion endok ta ashir. Khadija-i Paris nungi bener aruba Elie Saab gown ka asem aser iba gown ji seret 11.5 jungnüa taret liasü ta osang angazüker. Moscow nung luxury restaurant ka nung kiyimba sentong nung Jennifer Lopez, Sting, aser Enrique Iglesias nungeri shilem agi aser tarur ajak nem gold box ka nung apuani na tenüng den wedding date zülur agütsü. Mikhail Gutseriev, ya Russian billionaire aser Safmar Group founder lir. Pai oil, coal, real estate, aser retail maparen inyaker aser pa meyong rongsen \$3.7 billion shi lir.

Arunachal nung Yobin tsür kati mezüngbuba PhD degree angu

Itanagar, December 2, 2024

(Agencies): Arunachal Pradesh nung Yobin kin nungi Angi Nomasay Yobin-i tang mezüng atema PhD degree ngutetogo.

Angi-i Honibarnü Rajiv Gandhi University (RGU) nung 22nd convocation ceremony alidang iba alizüng tongtet.

Angi Yobin ya Changlang district kübok Gandhigram tsür lir aser "Status on Maternal and Child Health among the Lisu of Arunachal Pradesh" research atema PhD in Anthropology angu.

"Iba ya pungmang ka



asangsang nung atalokba lir. Kü tsürabur, kinungbo aser nisung ajaki ni yariba atema kanga pelar. Ni kanga nüma atanger aser pelar" ta lai ashi.

Laisa lar Yobin nunger lanurtem dang tajungtiba akümtsü aser alizüng tonga inyaksü ajungmeso.

Rajiv Gandhi University (RGU) convocation nung PhD degrees 123 agütsü aser parnok rongnung tetstür 66 aser tebur 57 dena lir.

RGU-isa Institute of Distance Education (IDE) students dena undergraduate degrees 8,082 aser postgraduate degrees 1,051 agütsüogo.

Iba sentong nung Governor KT Parnaik, RGU Chancellor Dr. J Suresh Babu aser tongti ketdangsrütem aden.

Guwahati nung STF-i taila sen Rs 2.995 lakh apu

Guwahati, December 2, 2024

(Agencies): Assam Special Task Force (STF)-i Deobarnü Guwahati nung Fake Indian Currency Notes (FICN) abener nisung ka apu.

Osang tejangja ka angazükba sülen STF-i Khanapara Research Gate area mita aodang temulung melemi

bilemer nisung ka apu ta Assam Police CPRO Pranabjyoti Goswami-i ashi.

Idangji STF-i iba nisung ket nungi Rs 500 denomination indang taila currency notes 599 bena aliba apu ta Goswami-i ashi.

Iba nisung ya Rajiv Rongpi (33) ta jangjaogo aser pa ket

nungi taila sen Rs 2.995 lakh den mobile phone ka puogo.

Rongpi ya West Karbi Anglong district kübok Harlong Juve nunger lir aser Guwahati kübok Geetanagar area nung telidak lir.

Iba dak sendakba nung police-i maneni bushisüngdang südar.

Garo Hills NPP MLA temi Cabinet menden talila meshir

Shillong, December 2, 2024

(Agencies): National People's Party (NPP)-i by-election nung Congress ket nungi Gambegre menden rakzükba sülen Garo Hills nungi MLA temi Meghalaya Democratic Alliance (MDA) 2.0 cabinet nung nübo talila meshir.

Meghalaya Legislative Assembly nung NPP MLA 32 lir aser parnok rongnung Garo Hills nungi MLA 19 dena lir.

Garo Hills nungi MLA temi United Democratic Party (UDP) nungi cabinet menden ka mesüra Hill State People's Democratic Party (HSPDP) minister Shakliar Warjri melentsü ashir.

MDA 2.0 cabinet nung minister 12 lir aser parnok rongnung NPP MLA 8 dena lir.

Taüngba cabinet mendentemji UDP nungi 2 aser BJP o HSPDP nungi kaka lir.

Chief Minister Conrad Sangma-i cabinet menden lemsashitsü atema olemtep kecha mali ta shiogo saka pai par NPP MLA temi ashiba mezüngtoktetsü ta osang angashir.

TMC lennir Charles Pyngrope dang Congress nung adentsü rongshir

Külen, Meghalaya Trinamool Congress (TMC) president aser Nongthymmai MLA Charles Pyngrope asoshi tayongzükba tulu ka ajurua lir.

Par party lennirtem aser züngsemtemi Pyngrope dang Congress nung adentsü rongshir. Ajisüaka pai ashiba agi ibaji meinyaktetsüsa ozüngtem lateta lir.

Pyngrope-i ashiba agi pa pusemertemibo Congres nung adentsü akok aser ibaji pai menokdangtetsü saka pabo madentsü.

Nongthymmai nung TMC züngem 1,500 tashi Congress nung denogo ta Congress lennir Ronnie V Lyngdoh-i ashiba sülen iba osang angashir.

Ajisüaka anti-defection rule ajanga Pyngrope-ibo TMC toktsür tanga party züngsem mekümtetsü ta angazüker.

NE Frontier Railway-i Guwahati nung laundry care center lapok



Guwahati, December 2, 2024

(Agencies): Northeast Frontier Railway-i Guwahati nung laundry care center tasen ka lapokogo.

Iba center nung anogoshia bedrolls 32,000 shitoka anepalutetsü aser passengers-i hygienic & high-quality linen agütsü.

"Iba boot laundry care centre nung bedrolls 32,000

shitoktetsü. Iba dak alia blankets aser pillow covers shitoker. Guwahati nung yangluba laundry ya tunnel-based system ka lir" ta

Northeast Frontier Railway CPRO Kapinjal Kishore Sharma-i ashi.

North Western Railway-ia Jaipur nung automatic washing plant ka ajanga passengers nem

linen tajung aser temerük agütsür ta Chief Public Relations Officer, North Western Railway, Captain Shashi Kiran-i ashi.

Indian Railways-i air-conditioned (AC) sleeper classes nung senzürtem nem abensüoshi temerük aser tajung agütsütsü atema technology tajungtiba amshitsü meranger.

Office of the
Longmisa Senso Mungdang
P.O.Mokokchung-798601. B.P.O. Longmisa
Mokokchung :Nagaland.

TENÜNGSANG AGÜTSÜR

Wb. Senkachuba Jamir aser Wt. R.Aliia Pongen na jala Kr. Medemenla Jamir NPSC-1/CTSE 2024 tatidang nung Pharmacists mapa Health & Family Welfare Department, nung ajangzüktetba asoshi LSM ajanga pelaba konang nüngsang aser tetushi agütsür. Tarutsü anogotem nunga maneni Tsüngremi takok moajang ta LSM-i sarasadema atar.

Sd/-
Yashiramok Ao
President, LSM

Sd/-
Watitoshi
G. Secretary, LSM

**DIMAPUR NOKPU SENSO TELONGJEM
RAFFLE DRAW RESULT**
DATED 30 NOVEMBER 2024

1st PRIZE B-0314 2nd PRIZE B-0468
3rd PRIZE D-1381 4th PRIZE A-1099

CONSOLATION PRIZES (20 NOS)

D-1044	C-0778	A-1316	B-1343
E-0854	B-0870	E-1047	B-1193
B-0922	E-1149	B-1083	C-1348
C-1017	A-0434	A-0324	A-0385
D-1047	D-0715	E-1076	E-0326

ALI AYOKER
FOOTHILL LEMANGANASA VIHOKHU NUNG ALILEPSA-AAYOKER.
TALITSÜ KIMONG ATEMA TAJUNG ANUNGJI TALINUR TEMI
IBA NUMBER NUNG CONTACT SÜANG. SQFT. NUNG 80/-
DIRECT CONTACT : 6009530632 / 6009094225

Imran Khan anema ken o tasen tenet benok



Adiala, Luchii/Dec. 02 (Agencies): Tawa Pakistan Tehreek-e-Insaf party ajanga longkak aitba dak sendakba nung ken o tenet benoka aliba mechi Hombarnü Pakistan nung anti-terrorism court ajanga taoba ato kilonser Imran Khan anogo 14 atema 'judicial remand' nung alitsü totuyuba agütsüogo.

September 28 nü Rawalpindi nung par party-i longkak aitba mechi ken o danga ka nung pa anogo trok tashi police ket nung aliba sülen arishi küm 72 tain Khan ya Adiala jail nung aliba anti-terrorism court judge dangi anir aru, kong pa ita aika tsüngten chiokdak yua lir.

Iba ken o ya Judge Amjad Ali Shah lenisüba kübok agi, aser iba mapang New Town police station case aser ano danga ken o trok dak sendakba nung Khan ya judicial remand nung alitsü court-i mela.

September 28 aser October 5 tsüngta danga ken o trok benoka aliba mechi police temi pa 'physical remand' meshiba obendangeri magizük. Khan ya judicial remand nung tepuokdaki yoktsüla, ta pai totuyuba agütsü.

Taoba ato kilonser ya par party-i longkak aitba dak sendakba ken o trok nung pua liasü. September 28, October 4 aser 5 anogotem longkak aitba

mechi New Town case densema pa anema ken o tenet benoka liasü.

Azüdokshi lendong ajurutsüsa pai longkak aittsü ayongzükbba mechi police station balala nung Khan atema ken o tasen benoka liasü.

Khan'er party yagu November 24 nü Islamabad indang Red Zone nung aliba D-Chowk nung mener longkak aita liasü, kong sorkar indang ki o jen timba lir. Iba longkak aitba ya mejungi kuma sepai aser civilian kar asü.

Iba longkak aitba ya Khan-i ajungmeso, shibai November 13 nü linük ajunga nung longkak aittsü ayongzüka PTI indang electoral mandate shidak amshitsü, party züngsemtem pua aliba chiochtsü aser 26th Amendment meyipshitsü khanga liasü, koba ajanga 'dictatorial regime' tashi itshir ta pai shia liasü.

November 24 nü longkak aitba dak sendakba ken o tasen 28 nungbo pa tang tashi mepui lir. Taoba ita Toshakhana ken o tanabuba nung bail anguba sülen Khan ya New Town police ken o nung Rawalpindi police-i pua liasü.

No-confidence vote ajanga 2022 küm April ita par sorkar chirepba sülen pa anema ken o aika benoka lir.

Georgia nung EU nung adentsü pusemertemi longkak aiter

Tbilisi, Luchii/December 2 (Agencies): Georgia yimtiba nung Deobar aonung densema anogo pezü atonga longkak aiterterem aser police tsüngda mangatetep adokogo.

Sorkari European Union nung adentsü atema sensaksema aliba anena atatsü asoshi telemtetba agiba sülen iba longkak aitba ya linük ajungai prokshia odar.

Georgia indang Ministry of Internal Affairs-i Hombarnü ashiba agi, pro-EU longkak aiter meyirejang aikati longkak aitba azüoktsü merangba mapang police ketdangsur 21 yiruogo.

Rally balala ayontzüka agiba mapang ajaka senteper nisung 224 puogo. Longkak aiterterem nem pro-West tir Salome Zourabichvili-i teyari agüja arudar.

"Temzüng ozüng kümzüka ayutsü aser Europe nung adentsü khanga Georgia nunger temi ano aonung ka maneni ajang ajanga nokdangogo. Yimtung nung longkak aiterterem anentsüba temaitsübo kecha mali," ta Zourabichvili-i X nung sangdong ka ajang ashi, shibai Georgia ya EU nung adentsü atema pusema arudar.

Nütsüng yongsük million 3.7 aliba linük nung ya tang linük yimsüsüa aliba party, Georgian Dream aser parnok anemertem tsüngda ita ishika mangatetep adoka arudar.

Iba party yagi tashi tali amshitsü meranger, anüolen aliba linüktem anema nokdaker aser Russia indang policy tem pusemer ta shia opposition-i parnok anema arudar.

Brehostibarnü sorkari EU nung adentsü atema sensaksema aliba anena atatsü

ta sangdongba sülen Brehostibarnü nungi mangatetep tenzük aser EU nung adentsü pusemer meyirejang aika aser police na raratepa arudar. Longkak aiterterem azüoktsü atema police-i tear gas aser water cannon amshia arudar.

Kasa mapang nung Zourabichvili-i, taoba ita agiba election magi kümdaktsütsü atema Constitutional Court nongshitsü ayongzüko. Iba election ya Georgian Dream party-i koka liasü. Opposition aser Zourabichvili napronglai iba election agiba mapang ochi mashi inkayim aika sendaka liasü, ta shiogo.

Georgia Ato Kilonser Irakli Kobakhidze-i, election agishitsü atema akhangba ya aitsüogo.

Georgian news agency Interpress-i ashiba agi, linük yimtiba nung dang masü saka longkak aiterteremi Black Sea kümbang nung aliba Poti yimti, koba linük indang commercial port tongtiba lir, iba yimti-i aoba lenmanga nokdanga liasü.

Georgia nung media sangdong balala ajang, jila aser yimti ti tashi nung nüburtemi longkak aitba indang metetdaksüogo. Opposition TV channel Formula-i, central Georgia nung aliba Khashuri jila nung nüburtemi local Georgian Dream office nung entsü mereplokja longkak aitba indang video ka sayua liasü.

Washington-i Honibarnü Tbilisi den tesendaktep aliba thia atatsü ta sangdongba Kobakhidze-i magizüki liasü. Pai ashiba agi, tang linük nung kechi ataloker ali iba ya khen atema dang, aser President-elect Donald Trump-i January ita office mapa agizükba sülen

Georgia-i administration tasenba den sensak asemstü.

Tir Zourabichvili-i Honibarnü ashiba agi, iba ita la term tembangba sülen lai mapa metoktsütsü. Laisa, parliament tasenba ya ozüng alema tentetba aser la melener shimtsü asoshi parnok dak kecha tashi mali, ta shiogo.

1991 küm Soviet Union chirepba sülen Georgia ya mapang talangba ka anüolen aliba linüktem dak metaloker arudar aser parnok takok tashi Russia den tesendaktepba mayutsü meranga aruogo.

Georgia ya taoba küm EU nung adentsü asoshi official candidate ka aküm aser parnok NATO nunga züngoksemtsütsü tenangzükbba agüja liasü.

Ajisüaka linük nung domestic opponent tem aser anüolen aliba linük sorkartemi, Georgian Dream party-i iba jenjang agia aliba nungi atsüngintsü meranger ta bilemer.

June ita iba sorkar yagi, nongovernmental organizations tem bendanglen nungi parnok indang senotsü teyari shilem 20 dak tema arua lira item lokti tentetem ya "foreign agents" ama züngoksemtsü asoshi temzüng ozüng ka yanglua liasü. Parliament-isa, September ita LGBTQ temeden azüoktsü atema temzüng ozüng ka agizükogo.

Sorkari ashiba agi, parnoki linük sovereignty kümzüka ayutsü meranger aser Russia den rara tasen ka mena-a Ukraine ama tia jenjang kati maitsü atema iba jenjang ya agir. Georgia aser Russia na 2008 küma mapa tatsüka rara adoka liasü, koba Georgia-i makok.

Syria nung telungpurtemi Aleppo yimti atsüng

Damascus, Luchii/December 02 (Agencies): Hay'et Tahrir al-Sham telungpurtemi Aleppo yimti maka atsüngogo aser iba ajang Syria army küm ti sülen iba yimti nungi atsüngintsüsa kümogo.

2020 küm sülen tang mezüngbuba northwestern Syria nung telungpurtemi iba yimti atsüngba mapang tesashitiba raraogo. 2020 küm sorkar anemertemi atsünger aliba tesemtem sorkar sepaitemi atsüngba sülen raratep anendaktsütsü atema Russia aser Turkey nati tenangzüktepba ka yanglua liasü.

2015 küm tir Bashar al-Assad pusema Russia-i shilem agiba sülen küm ka shi lir sorkar sepaitemi 2016 küm iba yimti atsünga liasü.

Defence-i Deobarnü sangdong ka ajang ashiba agi, air force-i linük army nem anüng ajang teyari agütsüogo, ta Russian news agencies-i metetdaksü.

Hay'et Tahrir al-Sham telok dang ya taoba mapang al-Nusra Front ta ja liasü. Iba telok ya United States, Russia, Turkiye aser tanga linük kari kiralongrar telok ama agizüker lir.

Washington nung White House National Security Council-i ashiba agi, parnoki tensa kanga junga asadangdar aser parnoki regional yimtiba tem den taoba ghonda 48 tsüngda tongtepretepa aruogo.

2011 Arab Spring longkak aitba sülen al-Assad anema nüburtemi yimjung nung longkak ait tenzük. Ajisüaka iba longkak aitba ya azütokshi lendong tulu ka küma ao aser sorkar anemertem aser

longkak aiterterem anema jenjang agi tenzükba sülen proxy rara ka küma liasü.

2011 küm nungi tang tashi nung nisung meyirejang aika tepsetogo aser nisung million aika pei talidak ki toktsür jenshiaogo. Iran aser Russia nati teyari agüja al-Assad-i aniba sorkar-i tongtibang yimtitem aser tesem balala azüokba sülen küm ishika tejakdang rara tulu adoka rara alibabo anenogo. Sorkar anema nokdakertem ya Turkiye den arrtsü nung Idlib province-i mintoka liasü.

Army-i ashiba agi, iba yimti amaktsü atema sentong yangludat aser anüng ajang telungpurtemi adenshia aliba tesem aser convoy tem makdar, ta pro-Damascus osangkaket Al-Watan-i sangdong ka ajang metetdaksü.

Sifan & Tebogo na nem Athletes of the Year naroküm agütsü



Letsile Tebogo

Sifan Hassan

Luchii/December 2, 2024 (Agencies):

Dutch marathoner Sifan Hassan aser Botswanan nunger sprinter Letsile Tebogo na nem World Athletics-i Athletes of the Year naroküm agütsüogo. Tenapronglai Paris Olympics nung gold medal ngua liasü.

Hassan, shibai out-of-stadium award ngua liasü, lai France yimtiba nung marathon asemtepba nung dang masü saka tanga asaya nunga kanga junga asayaba atema iba naroküm agütsüogo.

Anogo tenet tsungda lai 5,000 metres nunga bronze medal angu aser 10,000-metre asemtepba nunga shilem agiba sülen marathon nung gold medal ngua liasü. Marathon asema mapang lai world record bena alila Ethiopia tsür Tigist Assefa

dang nungi second asem agi takaraba alizung tongteta liasü.

“Ni iba naroküm angütsü imla maliasü,” ta Deobarnü Monaco nung iba naroküm anguba sülen Hassan-i ashi.

200m asemtepba nung Africa nunger rongnungi mezüngbuba Olympic champion akümba sülen Tebogo-ia iba naroküm agizükogo. Stade de France nung 200m final asemtepba mapang pai alizung 19.46 seconds nung tonga America nunger asemteper Kenny Bednarek aser Noah Lyles na ajateta liasü.

“Ni iba naroküm atema kü tenüng azüngba mapang aoksa, kechiyong ni iba naroküm angütsü imla maliasü,” ta Tebogo-i ashi.

World Athletics-isa Olympics nung takok angurtem

aika nem tetushi agütsütsü telemtetba agia liasü.

World Athletics Awards 2024:

- * Women’s World Athlete of the Year: Sifan Hassan (NED)
- * Men’s World Athlete of the Year: Letsile Tebogo (BOT)
- * Women’s track: Sydney McLaughlin-Levrone (USA)
- * Women’s field: Yaroslava Mahuchikh (UKR)
- * Women’s Out of Stadium: Sifan Hassan (NED)
- * Men’s track: Letsile Tebogo (BOT)
- * Men’s field: Armand Duplantis (SWE)
- * Men’s Out of Stadium: Tamirat Tola (ETH)
- * Women’s Rising Star: Sembo Almayew (ETH)
- * Men’s Rising Star: Mattia Furlani (ITA).

Del Potro tennis asaya nungi anisüngzüker



Luchii/December 2, 2024 (Agencies):

Taoba mapang US Open champion Juan Martin del Potro, Argentina nung Novak Djokovic den tatamsa exhibition asaya ka nung shilem agiba sülen asaya nungi anenogo.

Arishi küm 36 tain asayar yagi 2009 küm iba Grand Slam ya koka liasü. Ajisüaka pa yiruba ajanga junga masayateti aruogo.

Argentina nunger asayar ya 2019 küm temekok yiru aser pa tatembangbuba asayamung 2022 küm asayaogo.

Ajisüaka pa Buenos Aires nung ‘The Last Challenge’ nung shilem agi, kong pai asaya repranger 15,000 shi adenshia lia Djokovic 6-4 7-5 agi kokogo.

Del Potro asaya tom nunga

aiben nüktzü neta liasü aser asaya tembangba sülen Djokovic den talangka azütepba liasü.

Asaya tembangba sülen asaya nungi anenba temaitsü pai pa tekolak nung teti jeneter asayaba bandana net teyong nung tokja liasü.

“Ni Juan Martin del Potro memimba nisungbo ka danga monguka,” ta Djokovic-i ashi.

“Juan Martin ya asenok ajak atema tatishitsüka lir, aser pa taküm nung takok tulutibaji pa nisung kanga ajungba ya lir,” ta paisa shisem.

Roger Federer, Rafael Nadal, Carlos Alcaraz aser Gael Monfils nunger ajaki video ajanga Argentina nunger asayar nem ya tetushi agüja liasü.

Del Potro-i 2009 küm US Open final nung five-time

defending champion Federer koka liasü.

Iba sülen pa 2018 kuma New York nung final tonga asaya saka pa Djokovic-i tsükdaktsü.

Del Potro-i Olympics nunga medal ana ngur lir. Pai mezüngbuba 2012 küm bronze aser iba sülen küm pezü lir silver medal ngua liasü.

Pai pa indang career nung ATP kija asaya 22 kokogo aser pa world rankings nunga jenjang asempba tonga tua asayaogo.

Ajisüaka US Open akokba sülen pa tekanük yiruba ajanga junga masayateti aküm aser iba sülen ano 2019 küm Queen’s nung temekok yiruba ajanga tamajungba kümshi.

Del Potro-i taoba hopta Instagram nung video ka ajanga pa yiruba indang jembia liasü.

“Ni anogoshia inyakyim ya ni aginüba ama masü kanga tasak lir. Mapang kar nungbo ni tashi makai akümer,” ta pai ashi.

“2019 küm surgery agiba sülen ni tashiba makai stairs-i metuteter.

“Ni gari aniba mapang nunga tashiba lir aser mejanga aliba mapang nunga tashiba lir,” ta Porto-i ashi.

Liverpool-i City koka PL nung parnok jenjang yanglushiogo

Luchii/December 2, 2024 (Agencies): Deobarnü Liverpool-i goal 2-0 agi Manchester City koka Premier League nung temaba jenjang nung parnok jenjang yanglushiogo.

Anfield nung Deobarnü asaya nung Cody Gakpo aser Mohamed Salah nati goal koka idakja parnoki asaya akok. Asaya nung goal aikabo midaktsütetaka Liverpool puri iba asaya ya kanga junga amokbanger asaya liasü.

Premier League point table nung Liverpool sülen Arsenal aser Chelsea na lir. Team ana yagi Liverpool point teku agi memenepi lir aser City bo point 11 agi tajemba lir. Taoba season tenet nung City puri season pezü atonga title abenba den title trok bener lir, saka tang asaya aliba season nung parnoki junga masayateti arudar.

Premier League nungsa Manchester United-i manager tasenba Ruben Amorim lenisüba nung Old Trafford nung

mezüngbuba asayaba mapang Everton goal 4-0 agi kokogo.

Asaya nung Marcus Rashford aser Joshua Zirkzee nati goal anana idakja liasü.

Asaya nung mezüngbuba goal ya Rashford-i minute 34buba nung idaktsü aser iba sülen United-i asaya amokbanger asaya liasü.

Asaya mezüngbuba shilem tembangsü lia Zirkzee-i United atema tanabuba goal idaktsür goal 2-0 nung tembang.

Asaya tanabuba shilem tenzüker second 20 nung Rashford-i team asoshi tasembuba goal idaktsü aser minute 64buba nung Zirkzee-i United atema goal pezübuba idakja parnoki asaya akok.

Iba asaya akokba sülen United puri asaya 13buba koka Premier League table nung jenjang tekububai tuogo.

Everton pur taoba asaya pezü nung asaya ka danga koka mali. Parnok relegation zone-i point ana agi dang mei-i 15buba nung lir.

Guinea nung football asaya ka repranger nisung 56 asü



Luchii/December 2, 2024 (Agencies):

Guinea nung football stadium ka nung fan tem tsungda mangatettep adokba sülen jenshiba mapang nisung 56 ajemset aser aika yiruogo, ta Guinea sorkari Hombarnü metetdaktsü.

Deobarnü iba lendong tenzükdaktsürtem jangjatsü atema ketdangsürtemi bushisüngdang tenzükgogo, ta Communications Minister Fana Soumah-i ashi.

Asürtem rongnung tanurtema aika densema liasü, ta local media aser political party telok kati ashi.

Deobarnü Nzerekore yimti nung Guinea indang military lenir Mamadi Doumbouya nungdem nung ayongzüka local asayamung ka nung Labe aser Nzerekore na final asayaba mapang iba lendong ataloka liasü, ta PM Amadou Oury Bah-i ashi.

Local media sangdong balala ajanga ashiba agi, nübertem süngjemdaktsütsü atema police temi tear gas

amshia liasü. Asaya nung penalty ka agütsüba sülen iba mepetmesü tenzüka liasü.

“Penalty agütsüba atema fan tem mepelai long agi ona liasü,” ta Media Guinea-i metetdaktsü. Iba lendong nung tanur densema nisung aika süogo aser yirur alirtem mozüki ka nung temang anepaludar aser parnok rongnung karbo kanga mejungi yirur lir, ta kasa sangdong ajanga metetdaktsü.

Video ajanga, referee-i penalty agütsüba anema stadium tezükelen mener alir fan tem telok ka asatepba nguogo aser iba sülen nübertem ground telungi aiba sayuogo.

Kasa mapang nung nübertem stadium toktsür aotsü merangba mapang asemtepba aser atsu talanglang pongdanga aoba video tem ajanga sayuogo.

Video nungsa nübertem mozüki asütsü ta bilemba tesem ka nung ali nung longdaker aliba aser nübertem adenshia aliba den kari yirur alirtem anepaluba nguogo.

BILEMDANGANG

“Timla agi nisung ka tejaleni anir.”